



Ukiortaami oqaaseqaat

03.01.17

Inuit Issitormiut Siunnersuisoqatigiiffiannit – ICC Kalaallit Nunaannit tamassi 2017-imi Ukiortaami Pilluaqquassi

All.: Hjalmar Dahl, ICC Kalaallit Nunaanni siulittaasoq

2016-ip ingerlanerani nuannersunik pissarsinartunillu ingerlassani suleqateqarluarsimanerput pillugu qujarusuppugut. ICC Kalaallit Nunaannit tamassi Ukiortaami Pilluaqquassi.

Silap pissusaanni periarfissat aporfissallu

Issittumi avatangiisitta mianernartuunera tamanit ilisimaneqarpoq, ukiunilu makkunani tamanna ersarissartortumik namminneq isitsinnik takusinnaalersimavarput. Piniartut ukiut siuliini ukiuunerani sikup siaruarnissaanik pisariaqartitsilluinnartut ullutsinni sikusarnerata allanngornera, ukiullu ingerlanerani piffissami annertuumi piniariarsinnaajunnaartitsinera oqaluttuarisarpaat.

Issittup imartai aqqusaartorlugit angalasinnaanermut periarfissat nutaat amerliartorput, taamatullu aamma pisuussutinut uumaatsunut qanillattornissaq pisariunnginnerulerluni. Tamatumani misissueqqaarnissanut, tamannalu periarfissinneqassappat uuliamik gas-imillu imartatsinni Baffin-ip Kangerliumarngani qalluisoqarsinnaalissalluni.

Baffin-ip Kangerliumarngata sineriaani tamaani inuit piniartuusut taamatut ineriartortoqarnissaanik nalorninartorsiortinneqalerput. Issittumi nunap immikkoortuini ICC-qarfinni, taamatullu ICC Kalaallit Nunaanni sinerissap avataani ingerlatsiniarnerit annertuumik ernummatigineqarput.

Taamaammat Amerika-mi præsident-ip tunuartussanngortup Obama-p taama aarlerinartoqarnera paasilluarmagu nuannaarutigalugu tusarparput. Taamaalillunilu iliuuseqarsinnaatilluni aalajangikkaminut kingullernut ilaatillugu naalagaaffiup Amerika-p Issittortaani imartani annertuumik nutaanik uuliasiortoqarnissaanut gas-isiortoqarnissaanullu atajuartussamik inerteqqusiilluni. Kinguinngualu Canada-mi ministeriunerup Trudeau-p Canada-p Issittortaata imartaani assigisaanik aamma mattussilluni.

ICC Canada aamma ICC Kalaallit Nunaat ukiuni makkunani "*Pikialarsorsuup*" aqutsiveqarfittut ingerlanneqarnera pillugu annertuumik suliniuteqarput. Pikialarsorsuaq tassaavoq immap immikkortua *polynia*-mik taaguuteqartinneqartoq annertooq, ukiorlu kaajallallugu sikuneq ajortoq. Baffin-ip Kangerliumarngani Canada-p nunattalu akornanni inissisimavoq. Ilisimasat pissarsiarisinnaasat tamaasa, pingaartumillu atuisut ilisimasaat, katersorneqarput, taakkualu tunngavigalugit Pikialarsorsuup siunissami piujuaannartitsineq toqqammavigalugu aqutsiveqarfiunissaa qulaajarneqarluni.



Naalackersuinikkut qanorluunniit iliuuseqarniartoqaraluarpat ICC Kalaallit Nunaannut tunngaviusumik pingaaruteqarluinnartoq tassaavoq aalajangiiniarnerni ingerlatsinerit tamat oqartussaaqataanerat tunngavigalugu pisarnissaat. 2016-ip ingerlanerani naalackersuinikkut aalajangiinissat tungaasigut pilersaarutit innuttaasunut avatangiisinullu sunniuteqartussat pineqaraangata innuttaasut peqataatinneqarnerisa qitiutinneqarnissaa immikkut pingaartillu sammisimavarput.

Inuussutissarsiornerni aningaasarsiornernilu ingerlatitsinerni aallarnikkat ineriartortitallu ICC-p tungaanit pimoorussamik tapersersugarineqarmata naqissuserusupparput. Taamaalilluni ICC Alaska Issittumi aningaasarsiornikkut ineriartortitsineq pillugu peqataaffigineqarluartussamik 2017-imi marts-ip qaammataani Anchorage-imi ataatsimeersuartitsiniarpoq.

Eqqaamassavarput tamatta inuugatta assigiinngitsuulluta, tamannalu 2017-imi iliuuseriniakkatsinni tamani pingaartittuartaqaragatsigu.